

# 華府嘗試集

盧永春 攝

**第 98 期** 本刊作品如有涉及時評者，乃作者個人意見，與華府詩友社立場無關。

編輯順序：原則上，本刊之編輯順序為詩（近體詩之七律、五律、七絕、五絕、古體詩）詞、曲、簡體詩詞（現代詩詞）

## 贈丁邦新有序 陳新雄

余與邦新兄以音學訂交於中央研究院史語所主辦第一屆國際漢學籌備會議，時民國六十九年也。其後共同推動中華民國聲韻學會會務發展。民國七十九年邦新自港投詩，以文字唱和，亦已廿年，始終莫逆於心。民國九十八年，邦新投書相邀於臺北一敘，昔余以肝癌入院治療，未克如願。去歲余出版拙稿《伯元新樂府》、《陳新雄語言學論學集》、《文字學》三書，欲投稿請正。得邦新復函，並讀其〈死神的腳步〉，方知歷經鋸開胸骨，重大手術，聞悉不勝感歎，如兄與余，雖有意為固有語言文化，盡其綿薄，然疾病纏身，瞬成衰晚，因賦詩相贈，以誌此段因緣也。

與君名字兩同新。轉眼俱成歲暮人。  
平仄尚能隨你我，縱橫不復費精神。  
論音昔日為知己，述學如今怎激塵。  
但願門前諸俊彥，此生相繼莫沉淪。

## 和陳新雄贈丁邦新並序 丁邦新

辛卯之夏，余入院治療心臟阻塞，作繞道手術，瀕死不遠。伯元聞訊，承遠道贈詩，情致殷切，故人厚意躍然紙上。乃搜索枯腸，敬步原玉，勉為唱和以答之。伯元與余相交三十年，同以研究聲韻為己任；而伯元復致意於詞章，除精研蘇詩外，尚有和山谷詞之作，故詩中兼及之。

英雄鐵劍色猶新。慷慨長歌落拓人。  
錦繡詞章抒積鬱，艱難音韻費精神。  
東坡雅詠成知己，山谷高風拜後塵。  
蕩蕩神州才俊美，江河浩渺不沉淪。

## 民國百年國慶 陳新雄

中華民國百年神。民主自由方有因。  
革命孫文初設局，賡歌介石始清塵。  
諸侯割據艱難甚，倭寇兇危戰火頻。  
障礙算來皆已盡，山河拱手予他人。

## 虛與實 張暢繁

赤腳行沙樂海灣。人來人去俱歡顏。  
近潮看似千堆雪，遠霧平添幾座山。  
紅日初升雲譎詭，晨光普照水悠閑。  
汪洋變化無窮盡，虛實相生一瞬間。

## 過程 張暢繁

山青水遠碧雲天。江鳥清風逐畫船。  
美景良辰招霧雨，高官要職惹塵煙。  
來年可作春花賞，此世難逃地下眠。  
莫笑耳聾行動慢，他朝君也步先賢。

## 誰為共和枉斷頭 陳詠智

百年辛亥董狐憂。誰為共和枉斷頭。  
士失恒心君失道，府無綱紀院無謀。  
官欺庶子如芻芥，眾視衙差若寇讎。  
革命何期流熱血，依然血淚染神州。

## 知秋 漁樵耕讀

卧看閑雲逐晴日，初驚晝短綠蔭長。  
庭階細草沾晨露，院落葡萄散淡香。  
幾處蟲啾鄉陌靜，一時樹響夜風涼。  
情知海月從茲近，夜夜開軒待素光。

## 共友人夏遊敦煌 漁樵耕讀

故人同結少年遊。萬里長風下肅州。  
朔漠戈灘悵寥廓，秦閔漢月思幽悠。  
洞蟄寶藏禪光滿，沙唱神泉梵語留。  
但笑春風無見識，陽關不度恨千秋。

注：指鳴沙山和月牙泉。

## 看燕子悼亡幻燈片有感 王顏鑄

燕子夫妻事可哀。何堪夜曲暗徘徊。  
君今警我人間淚，牽手同心結不開！

## 和眉伶〈半因〉散文詩步韻 王顏鑄

半因慵懶半因春。柳葉空靈柳葉新。  
昔日相逢徒舊夢，于今別恨已前塵！

注：柳葉者眉也；靈者伶也。

## 中秋贈好友 高亦涵

功名利祿似雲煙。千古風流一笑間。  
但願好情如好月，人間天上共團圓。

## 秋聲 季肇瑾

靜廬階下晚蛩鳴。暮雨瀟瀟伴落英。  
風舞竹篁隨韻响，天音陣陣瀉秋聲。

## 南鄉子·賀南京第廿八中學 80 週年校慶 周涓

### 一、任重道遠

隔海望江寧。虎踞龍盤動我情。八十年間多少事，翻騰。不易來之朗朗聲。  
勤懇力躬耕。培育高才畏後生。萬紫千紅爭報效，群英。代代新人皆救星。

### 二、同事今昔

任教失尊嚴。不幸逢文革浪尖。辱罵鬥批兼下放，傷痕。煮豆燃萁急激煎。  
轉瞬換新天，老酒三杯解怨冤。喜看晚霞無限好，同仁。馬不停蹄仍并肩。

### 三、勞動花絮

公社麥秋忙。停課支農二埂鄉。收割捆堆無扁擔，肩扛。感動農民齊讚揚。  
隊長不聲張，親自車乾大水塘。活蹦蹦鰱肥鯽嫩，心長。難忘燒魚晚飯香。

## 玉蝴蝶· 蝴蝶夫人 李青瑾

細雨歇遙岑碧，雲天漠漠，雁切魂驚。  
不忍君離，南浦淚灑舟橫。暮春近、櫻花紛落；曉露滴、蝴蝶迴縈。嘆飄零。  
故園蕭索，煙柳愁凝。誰憑。淒風佇立，寂江漁笛，企頸傾聽。望極千帆，可憐何日問歸程？玉人碎、經年空等；夜幕垂、幻夢難成。恨無情。一輪孤月，數點稀星。

## 天香·空谷幽蘭 李青瑾

岩壁奔泉，樵風奏笛，倦客驚聞忽見。  
蕊綴深林，紗籠曲徑，蝶影盤桓迷戀。  
素心舒坦。微雨過、翠裳珠滿。輕啟醇唇欲語，回眸逸儀何限。江皋雁還向晚。映瀟湘、正煙霞燦。憔悴靈均撫珮，紉蘭佳伴。遙念當年楚畹。飲清露、依空谷溪澗。天地無爭，幽香獨綻。

## 秋江幽思 高亦涵

坡前草綠，處處青松。秋水遙接天際，幽思獨對江風。踏沙題句，寄意千言，儘浪淘不盡，畢竟總成空。悵嘆，天涯琴劍飄蓬，剩幾許豪情，都付與，笑談一夢中。

## 詩海拾遺 陳蘊白

### 去後方· 適逢戰火

走辭淪陷老家鄉。半路遭逢戰阻殃。  
淪落困窮人異地，山洪暴雨險身傷。

### 重慶· 躲警報

避寇逃奔入蜀東。嘉陵江畔有童蹤。  
夜來警報長嘶叫，拖屣披衣躲洞中。

註：這是陳女士的遺詩。其夫將其詩稿和所搜集的中國古典詩詞書籍捐給華府老年活動中心及本社。本社特選兩首發表，以誌紀念。

本刊若有勘誤，將更正於詩友社網站之電子版

華府詩友社網站：  
www.classicalchinese poetry.com



